

ERALDATZEKO SAGAR EKOIZPENA

EKOIZPEN EKOLOGIKORA EGOKITZEKO BIDE-ORRIA

Zure uztak ekoizpen ekologikoaren eskakizunak bete ahal izateko gida



**Euskadiko Nekazaritza eta Elikadura
Ekologikoaren Kontseilua**

Babestuta:



AURKIBIDEA

• <u>Inoiz galdetu al diozu zure buruari eredu konbentzionalak baliozkoa izaten jarraituko duen 10 urte barru?</u>	<u>2</u>
• <u>Zertarako balioko dizu bide-orri honek?</u>	<u>4</u>
• <u>“Ez dut uste ekologikoa hobeagoa denik” pentsatzen duen horietakoa bazara</u>	<u>5</u>
• <u>Zertan ezberdintzen da ekoizpen ekologikoa orain arte egin duzuketik</u>	<u>6</u>
○ <u>Bilakaera</u>	<u>6</u>
○ <u>Maneiuia</u>	<u>6</u>
○ <u>Ongarriketa</u>	<u>7</u>
○ <u>Landareen jatorria</u>	<u>7</u>
○ <u>Izurri eta gaixotasunen kudeaketa</u>	<u>7</u>
○ <u>Kutsadura gurutzatua</u>	<u>8</u>
○ <u>Garbiketa eta desinfekzioa</u>	<u>8</u>
○ <u>Erregistroak</u>	<u>8</u>
• <u>Zein da ziurtapen prozesuaren kostua</u>	<u>9</u>
• <u>Ekologikoan egoteagatik ere badaude laguntzak</u>	<u>10</u>
• <u>Alta eskatzetik ziurtagiriraino, pausuz pausu</u>	<u>11</u>

INOIZ GALDETU AL DIOZU ZURE BURUARI...

EREDU KONBENTZIONALAK BALIOZKOA IZATEN JARRAITUKO OTE DU 10 URTE BARRU?

Jakingo duzunez, NPBren ordainketa gehigarriak ingurumenerako onuragarriak diren praktikak konpentsatzeko sortuak izan ziren. Ordainketa gehigarri horien helburua da ekoizleek aparteko sari bat jasotzea merkatuak ordaintzen ez dituen -eta baserritarrek beraien egunerokotasunean egiten dituzten- zereginengatik. Izan ere, erosleak produktuagatik ordaintzen du, baina ez du ordaintzen lurra, fauna edota lursailen ertzetako landaredia zaintzeko nekazariak egiten duzuen lanagatik, edota erleek elikagaien ekoizpenean zein basa-landarediaren mantentzean egiten duten lan eskergagatik. Hala ere, kontsumitzaileek astebururo dute aukera baserritarrek “doan” zaindutako landa eremuaz gozatzeko.

2050era arte jarraitu beharreko ildoak zehazten dituen “**Itun Berde**”-ak argiki erakusten du ingurumenarekin abegikorrakoa den nekazaritza-eredu baten sustapena ez dela moda iragankor bat, epe luzerako estrategiak dituen plan bat baizik. ["Baserritik mahaira"](#) da estrategia horietako bat. Helburua da egun elikagaiak ekoizteko dugun sistema eraldatzea, iraunkortasun-irizpideak betetzen dituen sistema batean bihurtuz. Beste batzuen artean, erabilitako nekazaritza-azaleraren % 25 ekoizpen ekologikora bideratzea du helburu.

Hori guztia, jakina, [NPB berrian](#) islatzen da: Oinarrizko Laguntzek ingurumen- eta klima-baldintzak dituzte, eta diru-horniduraren %40 hartzen dute; Eko-erregimenek ingurumenerako onuragarriak diren nekazaritza-praktika batzuk biltzen dituzte, eta zuzeneko laguntzen %25 izan behar dutela ezarrita dago; Landa Garapenerako Neurrietan, aldiz, diru-horniduraren %35 ingurumen arloko neurrietara bideratu behar direla ezarrita dago. Finean, dirua ekoizpen iraunkorrera joaten ari da. Eta, nork jaso ditzake laguntza horiek guztiak burua gehiegi hautsi gabe? Ba... Ekologikoan ziurtatuta daudenak. Ingurumen-neurri horiek betetzen direlako ekoizpen ekologikoaren eredian. Ez da aparteko ezer egin behar.

Baina gida honen helburua ez da ekoizpen ekologikoa egiteagatik eskuratu daitezkeen laguntzez informatzea. Ez baitira laguntzak izango epe ertain-luzean sektorea bizirik mantenduko dutenak. Azken urteetan ekoizpen konbentzionalean ematen ari den joerak erakusten du, laguntzak laguntza, geroz eta zailagoa dela ekoizpena mantentzeko beharrezkoak diren horniduren prezio-gorakadak jasatea. Intsumoek ia %30 egin zuten gora 2022an, benetako astakeria urte bakar batean. Eta ez dira jaitsiko. Beste era batean esanda: 2022an, beraien jardunetik euro bat lortzeko, nekazariak [0,55 euro gastatu behar izan zituzten intsumotan](#) ekoizpena mantendu ahal izateko. Horri gehitu behar zaizkio horniduren gastuak, aholkularitzarena...

Aldiz, nekazaritzako errenta, zure poltsikoan geratzen den dirua, mende hasieran zegoenaren % 21 azpitik dago. Nola esan daiteke, garestiago saldu arren, gutxiago irabazten ari zarela?

Nork eramaten du zure sagarrondoaren errentagarritasuna?

Sagardo ekologikoak ez du ohikoa baino eskari handiagorik. Baina beste elaboratu batzuek ere badute, hala nola zukuek, konpoteak edo pureak. Une egokia da kontsumitzaileen beharrak aseko dituzten produktu berriak sortzeko, gutxi ustiatutako merkatu-hobi ekologiko batean. Era berean, Euskal Sagardoarekin ari denak ikusten du dena aurrera doala etiketan beste zigilu bat izateko, eta zigilu horrek, gainera, kalitatezko tokiko ekoizpen horri balio handiagoa ematen diola, eta, aldi berean, beste bezero mota bati atea irekitzen diola. Zigilu hori ekoizpen ekologikoa ziurtatzen duen euro hostoa baino ez da.

Ekoizpen ekologikoko teknikak ezartzen ari dira, mende erdi baino gehiagoko garapena duen errealitatea da. Horrela, badakigu lur gutxiagorekin, intsumo gutxiagorekin eta makina gutxiagorekin errentagarritasun handiagoak lortzen direla. Eta ekologikoan behintzat, prezioak egonkorrak dira, eta zuk negoziatzen dituzu.

ZERTARAKO BALIOKO DIZU BIDEORRI HONEK?

Ikusten ari zara joera dela ekologikorantz eraldaketa progresiboa egitea. Ekoizle batzuek argi ikusten dute, eta hala ere zalantzak dituzte. Honen arrazoia, askotan, informazio gabezia da: zaila ikusten dute, benetan zertan ez badakite ere. Are gehiago, askok uste dute ez dutela lortuko. Baina ziurtagiria lortzea urratsez urrats egiten den zerbait da. Kontua da gauza gutxi batzuk aldatzea, batez ere "beti bezala egiteko" ohitura aldatzea. Egoera batzuetan, "beti egin izan da horrela" errepikatzearen poderioz, badirudi modu tradizional hori dela onena, nahiz eta ez izan. Lehengo eredutik gauza onak hartu beharko dituzu, eta hain onak ez direnak hobetu.

Noski, asko praktikatzea beharko duzu. Eta ondo ari ote zaren zalantzak izanda ere, aurrera egin. Trantsizio-urte batzuk beharko dituzu ekoizpen onak lortzeko, zure ustiatzearen eta funtzionatzeko moduan aldaketak egin eta moldatzen zaren arte. Hori dena prozesuaren barnean dago. Baina ez du zertan zaila izan behar, gida honekin jakin dezakezu zein pieza erabili eta nola jarri, dena doitzeko.

“EZ DUT USTE EKOLOGIKOA HOBEAGOA DENIK” PENTSATZEN DUEN HORIETAKOA BAZARA

Esango nuke gida hau irakurtzen ari bazara ez dela jakin-minagatik bakarrik. Ziur aski, jakitun izango zara gauzak egiten ari ziren modua ez dela jasangarria ingurumenerako, ezta zure poltsikorako ere.

Esan gabe doa ekoizle ekologikoak ez direla ekoizle konbentzionalen talde lehiakidea: talde berdineko partaideak dira. Finean, ekoizpen ekologikoan garatu den jakintza, hein handi batean, eredu konbentzionallean egindako ikerketetan oinarritzen da. Izan ere, ikusten zen ohiko praktika batzuek ingurumen-ondorio kaltegarriak zituztela, eta ez zirela iraunkorrak denboran.

Oraindik hobetzeko tarte handia dago, ez gara ezagutzaren % 100era iritsi, baina badakigu nahikoa eredu jasangarrietarako trantsizioa hasteko ustategien biziraupena arriskuan jarri gabe: adibidez, badakigu herbizidak erabiltzeak bakterioen populazioak onddoenak baino askoz handiagoak izatea eragiten duela, eta, errebote-efektu gisa, gertatzen da, halaber, adbentizien presentzia askoz handiagoa dela; egiaztatu da, halaber, oinean egindako laborantzekin eta azaleko belar-kentze fisikoarekin, ongarriak aplikatzearekin batera, adbentizien karga murrizten dela eta laboreak indartzen direla. Horri lotuta, badakigu, Ca eta Mg arteko erlazio egokia mantenduz, landareen nitrogeno-beharrak nabarmen murrizten direla, betiere gure lurrak mikroorganismoen populazio osasuntsu eta orekatua badu. Landare-estalki iraunkorrari dagokionez, behar bezala kudeatzen bada, lurzorua (eta bertan dauden mikroorganismoak) higaduratik babesten du.

Finean, nahiz eta oraindik ekoizpen-prozesu berriak sistematizatzea eta partekatzea falta den, eta gidaliburu espezifiko gehiago garatzeko beharra dagoen, aurrerapenak ematen ari dira. Emaitzak berehalakoak ez badira ere (bai lurrak eta bai nekazariak egokitzen epe bat behar baitute), esanguratsuak dira. Adibidez, lurraren zikloak errespetatzen dituzten sistemak abian jartzea, materia organiko konpostatua emanez:

- konpostarekin emandako mikroorganismoek lurrean aldez aurretik zeuden mineralen absortzioan laguntzen dute, horrela, laboreek beren beharrak beteta dituzte ekarpen gehigarriak egin beharrik gabe. Beharrezko makro eta mikronutrienten guztiak eskuragarri dituen landare batek behar bezala egiten du fotosintesia. Honek hostoetan Brix gradu gehiago izatea ekartzen du, eta jakina da 12° Brix-etik gorako landare osasuntsuak izurrite eta gaixotasunekiko erresistenteagoak direla.

-
- Ondo erabiliz gero, belar-kentzearen eta tratamendu fitosanitarioen zati handi bat aurrezten duzu

ZERTAN EZBERDINTZEN DA EKOIZPEN EKOLOGIKOA ORAIN ARTE EGIN DUZUNETIK

Batzuetan, errealitatearekin bat ez datozen espektatibak ditugu. Batzuek uste dute ekoizpen ekologikoa produktu batzuk beste batzuentatik aldatzea besterik ez dela, eta kito. Baina hori ez da ekoizpen ekologikoa. Badira, halaber, pausoa eman arte urteak itxaron zituzten etxaldeak, pentsatzen zutelako mila aldaketa egin beharko zituztela eta, azkenean, ongarri kimikoa konpostarengatik aldatu besterik ez zuten egin behar izan.

Jarraian, ekoizpen ekologikoaren araudia betetzeko alderdi nagusiak laburbilduko ditugu. Edonola ere, kontuan izan: naturarekiko errespetu handia duen eta araudian ezarritako guztia betetzen duen ekoizpen-metodo bat jarraitzen baduzu ere, zure ekoizpena “ekologikoa” izan dadin eta merkatuan zure produktua “ekologikoa” aipamenarekin saldu ahal izateko, ziurtapen-prozesu baten sartu beharko zara.

BILAKAERA

- Zurezko laboreen ekoizpenera bideratutako lursailek 3 urteko bilakaera-epea pasa beharko dute ziurtapena lortu aurretik. Denbora-tarte horretan, maneiuak ekologikoa izan behar du, nahiz eta oraindik ezingo duzun zure produktua zigilu ekologikoarekin merkaturatu.
 - Lursailen konbertsio epea alta eskaera aurkezten duzunean hasten da.
 - Lursailen batean onartuta ez dagoen produkturen bat erabiltzen baduzu, lursail horrek berriz ere 3 urteko bilakaera epea igaro beharko du.

MANEIUA

- Lurzoruetan egiten diren lanek biodibertsitatea eta materia organikoa zaindu behar dituzte, eta lurra trinkotzea eta higatzea saihestu behar dute. Hori dela eta, ez da komeni lurreko maila ezberdinak irauli eta nahastuko dituzten lan sakonik egitea. Alternatiba gisa, nahastu gabe lurra harrotzen duten lan bertikalak lehenesten dira (subsolutua).
- Debekatuta dago herbizidak erabiltzea. Belarrak kontrolatzeko, laboreen txandakatzea, bitarteko mekanikoak, akoltxatuak eta ongarri berdeak txandakatuko dira.

-
- Ez da onartzen ekoizpen paraleloa, hau da, ohiko eran eta ekologikoan landatzen diren barietateek argi eta garbi bereizi behar dira adituak ez diren pertsonengandik. Bestela, sagarrondo guztiek ekoizpen ekologikoan inskribatuta egon beharko dute.

ONGARRIKETA

- Lurzoruaren emankortasuna eta jarduera biologikoa honela handituko dira:
 - Simaurra edo mindak aplikatuz, urtean 170 kg nitrogeno hektareako gainditu gabe. Materia organiko hori ustiategi ekologikoetatik etorri behar da, eta konpostatuta egon behar du. Simaur ekologikorik ez badago, manei estentsiboa duten ganadutegi konbentzionaletako simaurra aplikatu ahal izango da.
 - Materia organikoa aplikatzea, hala nola laboreen hondarrak, koberterak edo ongarri berdeak.
- Landareen nutrizio-beharrizanak ezin badira neurri hauekin asetu, [\(UE\) 2021/1165 araudiko II. Eranskinak](#) jasotzen dituen ongarri eta gaiak erabili daitezke.
- Konpostean, landarez nahiz mikroorganismo egindako prestakinak eta prestakin biodinamikoak erabili ahal izango dira.
- Ongarri nitrogenatu mineralak EZ DAUDE BAIMENDUTA.

LANDAREEN JATORRIA

- Landaketa berriak egingo badituzu, araudiak ezartzen du erabiltzen dituzun landareak ekologikoak izan behar dutela.

2024ko otsailean, [landare-ugalketako material ekologikoaren datu-basean](#) ez dago sagarrondo barietaterik. Beraz, landaketa berri bat egin behar baduzu, [baimena](#) eskatu behar duzu eta zure baieztapenaren zain egon landatu aurretik.

IZURRITE ETA GAIXOTASUNEN KUDEAKETA

- Izurri, gaixotasun eta belarren kontrola prebentzioan oinarrituko da, hurrengo jardueren bitartez:
 - Etsai naturalen sustapena eta/edo erabilera (heskaiak, ezpondak, gordeleku-landareak...)

-
- Espezie, barietate eta material heterogeneoak edo egokituak aukeratzeari lehentasuna ematea.
 - metodo mekaniko eta fisikoen erabilera, eta biofumigazioa
 - biosolarizazioaren tankerako prozesu termikoak.
 - Landareak babestu ezin direnean edota bizirik irauteko mehatxuak daudenean, [2021/1165 araudiko I. Eranskinean](#) jasota dauden produktu eta substantziak erabili ahal izango dira.
 - Produktu horiek aplikatu izanaren erregistro bat eraman behar da, honako hauek zehaztuz: arrazoa (prebentiboa, sendagarria); kontrolatu beharreko izurria edo gaixotasuna; produktuaren izena eta substantzia aktiboak; aplikazio-data/k; zein lursailetan eta zein laboreri.

KUTXADURA GURUTZATUA

- Alboko lursailek tratamendu konbentzionalak jasotzen badituzte, ezinbestekoa da kutsadura gurutzatua saihesteko neurriak hartzea. Adibidez, heskaiak landatzea, hesi artifizialak jartzea, balizko kutsadura-iturritik hurbil dagoen azalera-zerrenda ez biltzea, edo merkatu konbentzionalera bideratzea...

GARBIKETA ETA DESINFEKZIOA

- Desinfektatzeko eta garbitzeko erabiltzen diren produktuak ere ekoizpen ekologikoaren araudian baimendutakoak izan behar dute. Erregistratu egin behar da: produktuaren izena; substantzia aktiboak; aplikazio-data eta -lekua.

ERREGISTROAK

- Zure jardueraren erregistroak eraman beharko dituzu, landa-koadernoan behar bezala beteta, jasotako uzta saldu izanaren ziurtagiriak gordeta, erabilitako intsumoak erosi izanaren egiaztagiriak, edota abeltzainekin egindako akordioen bitartez jasotako konpostaren agiria...

ZEIN DA ZIURTAPEN-PROZESUAREN KOSTUA

Euskadin kontrol erakunde publikoa daukagu, horregatik, kostua zati batean diruz lagunduta dago, bai ziurtapenari dagokionez eta baita sustapen eta komunikazio ekintzei dagokienez. Beste zatia Euskadiko Eragile Ekologikoen Erroldan izena emanda dauden norbanako eta enpresek sustengatzen dute. Alegia, urtea bukatzen denean, eragile bakoitzari dagokion kuota kobratuko zaio berak aukeratutako kontu korrontetik.

Urteroko gutxieneko finkoa 90€ da, honi inskribatutako hektarea kopuruaren arabera kalkulatzen den kopuru aldagarria gehitzen zaio. Jarraian, erreferentziazko adibide batzuk:

- Sagarrondo 2,5 hektareatarako, 40€ gehitu beharko litzaizkioke kuota finkoari; beraz, 130€/urtean geratuko litzateke.
- Sagarrondoen 5 hektareatarako, 80€ gehitu beharko litzaizkioke kuota finkoari, eta horrek urteko 170€-tan utziko luke kuota.
- Eta 10 hektarea badira, 160€ gehitzen zaizkio, eta 250€-ko kuotan geratzen da.

Izena eman berri dutenentzat, lehendabiziko kuotari %50eko kenkaria ezartzen zaio.

EKOLOGIKOAN EGOTEAGATIK ERE BADAUDE LAGUNTZAK

Bai, badira laguntza gehigarri batzuk ekoizpen ekologikorako. Baina benetan, ez dadila hau izan hori egitera bultzatuko zaituen faktorea. Izenak berak dio: "Laguntzak" dira, beren eginkizuna da hain beharrezkoa den trantsizio horretan laguntzea. Eta ingurumena, paisaia eta biodibertsitatea mantentzeko egiten duzun lanaren kostuak ordaintzen laguntzeko. Konpentsazioak dira, beraz, ez zenituzke diru-sarreratzat hartu behar.

Erabakia hartzen baduzu, kontuak egin dituzulako izan dadila. Ekologikoan ekoiztea gutxiago kostatzen zaizula ikusten duzulako, eta produktua garestiago saldu dezakezulako. Egin zure kalkuluak, eta erabaki.

2023tik aurrera, Landa Garapenerako Neurriak ere NPBan bilduta egongo dira. Hiru talde handi izango dira. Esteka honetan, [NPB berriari buruzko laburpen-dokumentu bat duzu](#). Laguntza bananduetan, ekoizpenarekiko independenteak diren eta baldintzazkotasun indartua duten laguntzetan alegia, eko-erregimenetara (klima eta ingurumena) atxikitu ahal izango zara. Eta Landa Garapeneko Neurrietan, honako laguntza hauek jaso ahal izango dituzu: Ekoizpen ekologikoaren konpentsazioa ingurumen- eta klima-konpromisoengatik edota Kalitate-erregimenetan parte hartzeagatik.

Edonola izanda, laguntza hauetatik egokituko litzaizukena jakin ahal izateko, informazio pertsonalizatua ezinbestekoa da. Zer dagokizun eta zer baldintza dauden jakiteko, hurbildu zaitez zure Eskualdeko Nekazaritza Bulegora.

Badago eragin esanguratsua duen laguntza bat: Ekoizpen ekologiko ziurtatura trantsizioa egiteko laguntza. Honen barrua, badira aholkularitza kontratatzeke lerroak, 1.500 € artekoak eta % 100ean diruz lagunduak. Laguntza honek badu ere trantsizioaren bideragarritasuna egiaztatzeke azterlanak egiteko lerro bat, baita landa-bisitak antolatzeke beste bat, beren jardunbide egokiak partekatu nahi dituzten ekoizle erreferenteak ezagutu ahal izateko...

ALTA ESKATZETIK ZIURTAGIRIRAINO, PAUSUZ PAUSU

Ziurtapena berme sistema bat da kontsumitzailearentzat, non erakunde inpartzial batek bermatzen duen ekoizpena araudian ezarrita dauden baldintzen arabera egiten dela. Euskadin, ziurtapena publikoa da eta Euskadiko Nekazaritza eta Elikadura Ekologikoaren Kontseiluak (ENEEK-Ekolurra) egiten du. Bere kontrola Eusko Jaurlaritzako Elikagaien Kalitate eta Industriako Zuzendaritzak gainbegiratzen du, berau baita Agintaritza Eskuduna.

Eskaera-prozesua oso erraza da. Gida honen prestaketarako eragileekin egin ziren elkarriketetan guztiek baieztatu zuten prozesua ez dela batere zaila, eta lagunduak izan zirela uneoro. Zailena da ulertzea zein den izapidetan lehenengo eta zein datorren ondoren... baina horretarako daukazu hau esku artean.

1. INFORMAZIOA, DIAGNOSTIKOA ETA INSKRIPZIOA

Izan diagnostiko bat eskatzeko zein, oso argi baduzu, Euskadiko Eragile Ekologikoen Erroldan alta hartzeko, Kontseiluarekin harremanetan jar zaitezke sustatu@ekolurra.eus posta elektronikoan edota 946 271 594 telefonora deituta. Kontseiluko ikuskatzaile bat zurekin harremanetan jarriko da bisitarako data finkatzeko.

Diagnostiko batekin hastea erabaki baduzu, bertan adieraziko zaizu zure jarduera ekologikoan ziurtatzeko moduan dagoen edota, hala balitz, zeintzuk aldaketa egin beharko zenituzkeen araudi ekologikoa betetzeko.

Zure deiaren arrazoia izena ematea bada, ikuskatzailearen bisita jasotzen duzunean izen-emate eskaera beteko duzu, baita ziurtapen akordioa eta jardueraren memoria deskribatzailea. Horrez gain, ikuskatzaileak ziurtapenaren xehetasunak azalduko dizkizu, baita jarraipen bisitetan aztertzen diren puntuak zein gorde beharko dituzun erregistroak ere. Zure alta gauzatzeko beharrezkoak diren gainontzeko izapideak Kontseiluko teknikariek konprobatuko dituzte, zuk ez duzu horretaz arduratu beharko.

2. ERROLDAN INSKRIBATZEA ETA HASIERAKO BISITA

Behin dokumentazioa gainbegiratuta eta dena ondo dagoela ziurtatuta, Euskadiko Eragile Ekologikoen Erroldan inskribatuta egongo zara, eta zenbaki bat egokituko zaizu. Zenbaki horrek identifikatu eta ordezkatzeko zaitu ziurtapen ekologikoarekin harremana duen guztiarekin. [Ekolurraren webguneko](#) bilatzailean ikusgarritasuna izango duzu ere.

Momentu honetatik aurrera hasten da ere ziurtapen prozesua. Hau da, ekoizpen ekologikoaren arautegia betetzen duzula ebaluatzen hasten da. Izan ere, lehenengo urte horretan hasierako bisita jasoko duzu, non aztertuko den zein neurritan betetzen ari zaren arautegia:

- Memorian adierazitakoaren arabera jarduten zarela
- Intsumoak, lehengaiak eta ekoizpen-prozesuak ekoizpen ekologikoaren arauak betetzen dituztela (intsumo-erosketen fakturak aztertuko dira)
- Egiten duzuna erregistratzen duzula zure laboreen koadernoan
- Neurriak hartzen dituzula baimenduta ez dauden produktuekin kutsadura ekiditeko.

Debekatutako substantziarik erabiltzen ez duzula egiaztatzeko, laborategian analizatzeko laginak jaso daitezke.

BILAKAERA EPEA

Bilakaera epeak lurra eta zu zeu manei-aldaketara egokitze balio du; aldi berean, aurreko praktiken hondakinak ezabatzen dira, araudi ekologikoarekin bat datozen ekoizpen-prozesu berriak ezartzen dira, edo ezagutza berriak eskuratzen dira.

Zurezko laboreen ekoizpenean, alta eskaera formalizatu zenetik 3 urte igaro beharko dira. Gerora ezustekoak saihesteko, kontuan hartu beharko zenuke hori: zure helburua 2027an zure sagarrak ekologiko gisa saltzea bada, alta formalizatu beharko zenuke, beranduenez, 2024ko udazkenean, 2027ko irailean uzta hartzen duzunean ekoizle ekologiko gisa duzun ziurtagiria izan dezazun. NPBko laguntzak eskatzen badituzu, kontuan izan behar duzu laguntzak otsailetik maiatzera bitartean izapidetzen direla: ekoizpen ekologikorako laguntzak eskatzen badituzu, ezinbestekoa da Eragileen Erregistroan inskribatuta egotea.

3. ERABAKIA

Hasierako auditoretzatik sortu dokumentazio guztia Ziurtapen Batzordeak aztertuko du. Batzorde honek egiaztatzen du bai egiten dituzun prozesuak, bai erantsitako dokumentazioa egokiak direla, arautegia betetzen dela, eta horretan oinarrituta erabakia hartzen da. Balorazioa positiboa bada, Zuzendariaren onespena jasotzeko pasako da.

4. URTEKO JARRAIPENA ETA ZIURTAGIRIEN JAULKIPENA

Adostasun ziurtagiriak urtebeteko balioa dauka, beraz, ezinbestekoa da aldiro-aldiro zure ekoizpenaren gaineko konfiantza mantendu eta berritzea. Horretarako, Kontseilua informatuta mantendu beharra daukazu eta zure jardueraren jarraipena egitea ahalbidetu, urteroko auditoretza bat izatea onartuz. Horrezaz gain, auditoretza gehigarriak zein jakinarazpenik gabeko ezohiko auditoretzak jaso zenitzake, Kontseilutik egindako arriskuen balorazioaren arabera.

Auditoretzak aldekoak badira, Zuzendariak ziurtagiria berrituko du. Ez adostasunak badaude, hauek zuzendu beharra dago berritze prozesuarekin jarraituko bada. Ez adostasunaren larritasunaren arabera, gerta liteke bilakaera-epe berri bat finkatzea, ekoizpena deskalifikatzea edota, kasu larrienetan, ziurtagiria kentzea.

➤ **“Bilakaeran” ziurtagiria**

Bilakaerako lehen urtea igarota eta gorabeherarik gabeko jarraipen auditoretza pasata, zure ekoizpena Europako araudiarekin bat datorrela adierazten duen ziurtagiria ematen da. Lehenengo eta bigarren urte horietan, zure ziurtagiria "Bilakaeran" izango da. Oraindik ezin izango dituzu zure produktuak ekologiko gisa merkaturatu, baina aukera izango duzu “ekoizpen ekologikora bilakaeran” izendapenarekin saltzeko. Ezin izango duzu oraindik eurohostoaren zigilua erabili etiketan, ezta Ekologikoa/Biologikoa/Organikoa aipamenak ere.

➤ **Ziurtagiri “Ekologikoa”**

Hirugarren urteko jarraipen-bisitaren ondoren, dena zuzena izan bada, ziurtagiri ekologikoa emango da, inskribatuta dituzun produktuetan Ekologikoa/Biologikoa/Organikoa aipamena erabiltzeko baimena ematen dizuna. Saltzen dituzun produktuak etiketatuta badaude, ziurtatu behar duzu etiketan ekoizpen ekologikoaren aipamenak zuzenak direla. Kontseiluko teknikariekin egindako kontsulta batek argituko dizkizu izan ditzakezun zalantzak.